

## Iwwer ebbes onnersders

Aach wenn merr e bissi elder iss, kann merr immer noch ebbes meddem Friebling oofonge. Merr dut, wenn die Sunn scheine dut unn wenss schee warm iss, uff soiner Terrass, uff soim Balkon odder uffere Bonk innem Park sitze, dut sich umgugge wie die Blumme blieh unn dut heern, wie die Veeschelscher singe.

Unn wenn oom donn rote Tulwe oolache, wenn e Omsel singe dut unn dorsch de blaue Himmel die Schwalwe unn die Mauerseescheler flitze, donn waaß merr, ess iss schee uff de Welt.

Wenn merr donn noch dess Glick hott, widder uffsteie ze kenne unn erumzelaafe, aach wenn merr ab unn zu enn Stegge deferr brauche dut, wenn merr donn noch waaß, wassses gessdern unn vorgessdern ze esse gewwe hott, donn kann merr su rischdisch glicklich soi.

Wie mir uns doodriwwer unnerhalle hawwe omm letzde Sunndaachmoie, de Schorsch, unn isch, doo sinn mir zwaa uns oonisch gewese, dasses e Gnad iss, dess su noch erlewe ze kenne, unn wenn merr donn noch zesomme iss mette Fraa unn dasses der aach su einischer mooße gut gieht, donn kann merrm Herrgott unn de Muddergottes doodeferr donkbar soi.

No ja, seet de Schorsch, awwer immer wenn isch droo denke due, dasses mir unn de Fraa noch gut gieht, doo muss isch immer onn die onnern denke, die e gons Meng mett sich erumdraache misse.

Awwer, habb isch gesaad, gibt's vor alle Dinge vill Fraue, die ihr Menner betreue unn trotzdem immer gut druff sinn, die losse sichs nor selde oomerke, was ferr Belastung dess iss, ihrn Monn Daach unn Nacht ze betreue, also immer ferrn doo ze soi. Unn aach Menner duts gewwe, die dess grad su gut aach ferr ihr Fraa mache. Die misst merr emol ehrn, su Fraue unn su Männer.

Ach naa, seet de Schorsch, die wolle nitt geehrt werrn, die wolle aach koo Mitleid unn aach nitt bedauert werrn, nor monschmol hawweses gons gern, wenn merr dene e bissi helfe dut. Unn wenss nor su iss, dass merr se mol oorufe odder emol besuche dut. Odder dass merrn emol e Kärtsche schreiwede dut, meddem scheene Gruß odder su.

Dess stimmt, saach isch, unn wenss donn e paar Leit sinn, die su e Kärtsche noch unerschreiwede dun, donn waaß merr, dass merr nitt vergesse iss. Isch habb mich sellemols su gefreit, als unser Kameradschaft mir die Kart zur Genesung ins Kronkehaus geschickt habbt, die ihr beim Kaffeedrinke im Bootshaus geschriwede habbt, doo sinn merr vor Freid die Träne in die Aache kumme.

Iwwertreibs emol nitt, seet doo de Schorsch, awwer heit hawwe merr mol iwwer ebbes onnersders gebabbeld, awwer dess muss joo aach emol soi.

Eiern Honnes